

Pencemaran Sungai Kim Kim sudah berlarutan lama



# KAMI SUDAH LALI

BERITA DI MUKA 2 & 3

» Kes pembuangan toksik ke dalam Sungai Kim Kim, Pasir Gudang, Johor sudah lama berlaku.

» Penduduk dakwa sungai itu sudah tercemar teruk, akibat kegiatan pembuangan sampah sejak beberapa tahun lalu.

» Hampir setiap minggu air sungai ini bertukar kekuningan dan hitam tetapi kes pembuangan toksik Khamis lalu, adalah terburuk.

» JAS syak pencemaran berpunca daripada pembuangan sisa minyak.

Oleh MOHAMAD FAIZAL  
HASHIM

pengarang@utusan.com.my

## ■ JOHOR BAHRU 8 MAC

**P**ENDUDUK Kampung Bukit Pulai, Pasir Gudang dekat sini sudah lali dengan kesan pencemaran di Sungai Kim Kim beberapa tahun yang lalu namun pembuangan sisa kimia pada malam kelmarin adalah yang terburuk.

Menurut Zulkifly Kassim, kesan pembuangan sisa kimia ke dalam sungai itu menyebabkan berlakunya pencemaran udara dipercayai gas metana hingga menjejaskan 200 penduduk di kampung dengan bau busuk dan air yang kotor.

Katanya, keadaan mereka lebih terjejas berbanding kampung lain kerana berada 300 meter daripada tempat sisa kimia dibuang dipercayai oleh sebuah lori tangki berhampiran kawasan pembinaan jambatan di sungai tersebut.

“Boleh dikatakan hampir setiap minggu air sungai ini bertukar menjadi kekuningan dan hitam. Cuma pencemaran kali ini jauh lebih teruk kerana mengeluarkan bau busuk yang kuat hingga terasa pening, loya dan muntah-muntah.

“Walaupun sudah dua hari berlalu, bau busuk itu masih ada setelah sisa kimia yang dibuang ke dalam sungai melekat di tebing,” katanya kepada pemberita di sini hari ini.

Semalam, seramai 1,400 pelajar Sekolah Menengah Kebangsaan (SMK) Pasir Putih dan Sekolah Kebangsaan (SK) Pasir Putih, diarah mengosongkan



## Sudah lama Sungai Kim Kim tercemar 'Kami sudah lali'

kawasan sekolah kerana terdapat pelajar mengalami sesak nafas, muntah dan pengan selepas terhidu gas dipercayai dari bahan kimia yang dibuang ke dalam Sungai Kim Kim.

Setakat ini, seramai 39 mangsa termasuk 21 pelajar SMK Pasir Putih dan SK Pasir Putih serta orang awam sedang dirawat di Hospital Sultan Ismail selepas terhidu gas tersebut.

Zulkifly berkata, sungai yang

berada kira-kira 50 meter dari rumahnya itu dahulu mempunyai banyak hidupan air seperti ketam, udang dan ikan sebelum dicemari oleh pihak tidak bertanggungjawab.

“Sejak menetap di sini pada 2004, air sungai ini jernih dan mempunyai banyak hidupan air dan menjadi punca pencarian pemancing di sini. Bagaimanapun, sejak kawasan perindustrian mula membangun di ka-

**ZULKIFLY KASSIM** menunjukkan kesan sisa bahan buangan berjadual yang mencemarkan Sungai Kim Kim di Kampung Bukit Pulai, Pasir Gudang Johor, semalam. - UTUSAN/NUR AISYAH MAZALAN

wasan ini, kualiti air semakin buruk. Malah keadaan sungai juga mula berubah menjadi cetek dan kotor. Kami sudah lali dengan bau busuk dan keadaan air sungai yang semakin kotor,” katanya.

Katanya, dia sudah buat laporan polis di Balai Taman Pasir Putih kira-kira 11 malam tadi selepas kejadian itu namun masih belum ada tangkapan dilakukan oleh pihak berkuasa.



MIS 01, 02, 103

## Wanita pengsan dipercayai terhidu bahan kimia

**JOHOR BAHRU 8 Mac** - Seorang wanita pengsan dipercayai akibat terhidu bahan kimia di sebuah kolam memancing di Jalan Cermat 2, Taman Kota Masai, dekat Pasir Gudang, awal hari ini.

Pengarah Jabatan Bomba dan Penyelamat Johor, Datuk Yahaya Madis berkata, pihaknya menerima panggilan kecemasan pada 2.41 pagi yang memaklumkan terdapat bau mencurigakan di kawasan kolam memancing tersebut.

"Wanita berkenaan dibawa ke Hospital Sultan Ismail oleh sebuah ambulans bagi mendapatkan rawatan manakala pasukan Unit Bahan Berbahaya (Hazmat) turut membuat pemantauan di lokasi berkenaan bagi mengenal pasti punca kejadian," katanya dalam kenyataan di sini hari ini.

Yahaya berkata, pemeriksaan Hazmat bagaimanapun mendapati bacaan udara di kolam memancing itu tidak menunjukkan pencemaran dan berada pada paras selamat. - BERNAMA

# 3 petugas perubatan turut dirawat

**JOHOR BAHRU 8 Mac** - Tiga petugas perubatan antara 39 mangsa yang masih dirawat di Hospital Sultan Ismail (HSI) di sini akibat terhidu gas kimia di Sungai Kim Kim, Pasir Gudang, dekat sini semalam.

Timbalan Pengarah (Perubatan II) HSI, Dr. Surya Marsom berkata, petugas perubatan tersebut merupakan antara pihak yang memberi perkhidmatan di lokasi kejadian.

"Kejadian semalam turut mengakibatkan tiga petugas perubatan ditempatkan ke wad bagi menerima rawatan ekoran terhidu gas kimia.

"Tiga petugas itu masing-

masing merupakan seorang doktor dan jururawat yang dimasukkan ke dalam wad, serta seorang pemandu ambulans yang ditempatkan di Unit Rawatan Rapi (ICU)," katanya kepada pemberita selepas lawatan kerja Timbalan Menteri Pendidikan, Teo Nie Ching di HSI di sini hari ini.

Sementara itu Nie Ching memberitahu, Kementerian Pendidikan mahu individu bertanggungjawab dalam insiden itu diambil tindakan tegas.

Katanya, mereka akan bekerjasama dengan pihak berkuasa termasuk Jabatan Alam Sekitar bagi menyasat insiden ber-

knaan kerana membahayakan nyawa orang ramai.

"Perkara ini bukan pertama kali berlaku, hujung tahun lalu sebuah sekolah di Klang, Selangor terpaksa ditutup kerana berlaku kebocoran gas di kilang ais sebelahnya, namun ia tidak seteruik ini.

"Tindakan tegas perlu diambil kerana insiden ini telah membahayakan nyawa," katanya.

Tambah beliau, arahan penutupan kedua-dua sekolah itu ketika ini kekal sehingga Sabtu, namun sekiranya keadaan masih belum selamat, penutupan sekolah akan dilanjutkan.



**TEO NIE CHING** (tengah) bertanya khabar keadaan Harry Martin Ebom semasa melawat mangsa pencemaran bahan kimia di Hospital Sultan Ismail di Johor Bahru, semalam. - UTUSAN/BAAZLAN IBRAHIM